



La suprastanza da l'Uniun chantunala da chant dal Grischun cun il president da la cumissiun da musica: Jürg Wasescha, Martin Zimmermann, Josy Bonolini, Andrea Accola, Amarilli Fritz, Retus Giger e Flavia Walder-Hublard (da san.).



Jachen Janett (dretg) cun Romeo Gianotti, ses successor en la cumissiun da musica.

FOTOS G. N. STGIER

Pauc interess per las purschidas da l'uniun

Uniun chantunala da chant dal Grischun

DA GION NUTEGN STGIER / ANR

■ Il Sursilvan Retus Giger resta er ils proxims traïs onns president da l'uniun tetgala dals chantadurs e da las chantaduras da noss chantun. Da nov a la cumissiun da musica appartegna Romeo Gianotti. El remplazza Jachen Janett che è sa retratg da quel gremi suenter 22 onns. In di da belleza ha dà la culissa a la radunanza da delegads da l'Uniun chantunala da chant dal Grischun a Valendau. Organisà l'occurrence en ina moda simpatica ha il «Gemischter Chor Valendas», ina furmazion cun 26 chantadurs e chantadurs. Quel chor hâ lura cun in matg chanzuns er dà a la radunanza da delegads la dretga temprantica. En general è l'onn 2011 stà in onn pli quiet per il chant cun excepiuns da las duas festas da chant districtuals a Glion ed a Zernez. Per l'uniun tetgala sezza èn las preparativas per la 25. Festa da chant chantunala Trun 2012 naturalma in stads en el center. Percunter betg en el center èn stads ils curs che l'uniun ha organisà per dirigents e per chantadurs e chantaduras. L'interess saja stà pliost manglus, ha ditg Martin Zimmermann, il president da la cumissiun da musica. Dals blers curs haja sulet il forum da chors ad Aschera gi lieu. «Nus co-nuschain betg ils motivs per l'interess

pliost manglus dals curs», ha menziunà Martin Zimmermann. Er betg realisà è vegni il champ da chant per uffants a Glion. Quest onn ha il curs da dirigents betg lieu durant la stad, mabain a la fin d'october. Er betg lieu d'atun ha il 3. forum da chors, mabain pir il schaner 2013.

Jachen Janett nov commember d'onur

Ils affars statutarics han procurà per naganas discussiuns. En tavla èn er stadas elecziuns e cun grond applaus è Retus Giger vegni reeleggi per ils traïs proxims onns sco president da l'Uniun chantunala da chant dal Grischun. Il Sursilvan è dapi nov onns al timun da l'uniun cun buna-main 4600 commembars e commembars. Reelegids èn quel gremi èn er vegnids Andreas Accola, Jürg Wasescha, Josy Bonolini, Amarilli Fritz e Flavia Walder-Hublard. Sco nov revisur han ils preschents elegì Giancarlo Lozza per Pauli Dosch. Reelegida en quel uffizi è vegnida Flurina Giott. Suenter 22 onns sco commember da la cumissiun da musica è sa retratg Jachen Janett. Durant quels dus decennis è el stà ina ferma pitga per quella cumissiun ed in um fitg engaschè. Cun in ferm applaus han ils delegads remunerà sia lavur e nominà l'Engiadinais sco commember d'onur da l'uniun tetgala

dals chantadurs e da las chantaduras. Il post da Jachen Janett surpiglia da nov Romeo Gianotti, in um enconuschen sco dirigent da divers chors en las Vals dal sid grischunas ed en Valtellina. Confermads en la cumissiun da musica èn vegnids Martin Zimmermann sco president, Manuela Bühlér, Andrea Schmed-Camathias ed Andrea Veraguth de Groot.

81 novs veterans federali e chantunals

Il dumber dals chantadurs e da las chantaduras ch'appartegnan a l'Uniun chantunala da chant dal Grischun è danovamain sa reduci e quai per 162 commembars e commembars. Entrads da nov en l'uniun èn traïs chors e sortids da quella èn dus chors. Total appartegnan a l'uniun 144 chors cun 4563 chantadurs e chantaduras. In act festiv è adina l'onurificaziun dals veterans e da las veteranas. A Valendau èn vegnids undrads 35 umens e dunnas per lur fidaivladad da 35 onns tar in chor e 46 chantadurs e chantaduras per lur commembranza da 30 onns tar in chor. Da quels 81 undrads derivan gist 51 da chors rumantschs. La proxima radunanza da delegads ha lieu ils 16 da mars 2013 ed organizada vegn quella dal «Männerchor Igis», in chor che vegn l'onn proxim 175 onns.




Dus presidents da dus districts da chant: Hans Marugg e Roland Capeder (da san.).



Da nov veterans chantunals èn Imelda Vincenz-Sgier e Renata Cathomas (da san.).



Representants per tuts veterans chantunals e federali: Dumeng Duschletta, Gion Arpagaus e Johann Florian Hertner (da san.).



Da buna luna èn tar la radunanza a Valendau er Manuela Bühlér, Gian Rudolf Cazin e Johanna Bühlér (da san.).